

Rapport annual da GIUVNETETGNA CADI

Prest scrivin nus el calender igl onn 2012. Sur da quei onn ei vegniu scret dabia novitads. Bia da quei che savess far vegnir malsegirs nus el meini che nies mund existi aunc vinavon suenter igl onn 2012. Mo quei ei musica dil futur ed jeu vi uss bugen dar a vus ina cuorta revista sur dil curriu e passau digl onn 2011.

Igl onn da fatschenta ei sesplegaus senza incaps ed il biro a Trun ei plaunsiu vegnius enconuschents a nossa populaziun. Plascher fa adina sche giuvenils visetan mei spontanamein en biro. Las localitads da biro fan denton era in bien survetsch per sesidas cun la giunta, cun las differentas gruppas da lavur, geraus e commembers dallas uniuns da giuvenetgna. Dapi la primavera 2010 havein nus in central liug per sentupar.

Il giavisch dalla cumission dalla lavur da GIUVNETETGNA CADI pil program da lavur digl onn 2011 ei stau da dar peisa sin ina buna collaboraziun cun las uniuns da giuvenetgna dalla Cadi. Nus havein fatg quei cun envidar igl avrel tut las suprastonzas dallas ugs ad ina sentupada a Mustér. Il num che nus havein elegiu ei « **stender la reit** ». Nossa giuvenetgna duei saver dir tgei giavischs e basegns ch'ella ha. Jeu hai creau in pign questiuinari per saver eruir ils basegns dallas uniuns da giuvenetgna. Biaras uniuns han miserias da survegnir glied engaschada, seigi quei per en suprastonza ni commembers activs. Igl ei grev da far capir ch'il post da lavur da giuvenetgna ei cheu per sustener e segidar cun las uniuns da giuvenetgna e buc per cargar si lavur supplementara. Las uniuns da giuvenetgna vegnan tgamunadas da giuvens carschi ed jeu s'imagineschel ch'els fan marschar lur uniuns tip-top e drovan el mument buc in pli stretg contact cun GIUVNETETGNA CADI.



Alla cumission da GIUVNETETGNA CADI schai propi a cor che nossa giuvenetgna sesenti bein e vegni sustenida cheu en nossa regiun. Perquei ha ella vuliu anflar ora, ensemen cun delegai dallas uniuns da giuvenetgna tgei che fussi la visiun da nos giuvens ed aschia saver metter entuorn il program da lavur aschi bein sco pusseivel tenor quella visiun. Ils 16 d'avrel havein nus envidau, specialmein las uniuns da giuvenetgna ad in di da lavur a Trun ensemen cun signur David Pfulg, cusseglader cantunal per fatgs da giuvenetgna. In grond giavisch ei stau dad haver bunas plazzas cheu en la regiun, plinavon da dar spazzi alla giuvenetgna, mo era da motivar nos giuvens da s'engaschar ella politica. Per saver realisar quella visiun drova ei nus tuts, era las instanzas politicas, ultra da quei bunas pusseivladads da sescolar ed ina sauna economia.

Scolas

Il davos d'uost hai jeu visitau tut las scolas superiuras dalla Cadi. Ils menaders da scola ed ils scolasts ein bugen prompts da dar suatientscha a miu giavisch da saver presentar als scolars il post da lavur e lur purschidas. In bien contact e far enconuschent ei igl A ed igl O per ina buna collaboraziun.

Per far enconuscent nossas purschidas havein nus era la pagina d'internet. Ella vegn beintgirada da dunna Inge Venzin, che ei dapi igl avrel secretaria tier GIUVNETGNA CADI. Ella ha, per esser aunc pli datier al mund dils giuvenils, aviert sin facebook ina gruppa e pagina sut il num da GIUVNETGNA CADI.

Prevenziun

Prevenziun schabegia el mintgadi, cun haver in'ureglia aviarta e schar sentir ils giuvenils ch'els seigien giavischai e buc mo tolerai en nossa societad. Els ein ella vegliadetgna d'empruvar ora e dad ir sul cunfin, era quei che pertucca il consum da tuts mieds environts. Nus savein e duein era adina puspei far attents els sin ils aspects negativs e prigus quei che pertucca il maldiever da mieds donnegionts.

Sco usitau ha GIUVNETGNA CADI era uonn collaborau cun las instuziuns per promover ina buna sanadad e tenuta, Zepra ed Aidshilfe Graubünden, agl Indoor Festival a Mustér ils 8 e 9 d'avrel agl open air Trun ils 25 da zercladur ed agl open air Lumnezia ils 22 e 23 da fenadur. Nos mottos ein stai uonn : «Beiba mo empau, lu has buc mal il tgau!» ed «Igl alchi lai, cun gummi fai!»

La responsabladad gronda per l'organisaziun ei uonn stada tier GIUVNETGNA CADI. Il project «Smartconnection» cuosta empau, nus havein saviu realisar quei project sulettamein cun il sustegn finanziel dalla regiun surselva. Engraziel fetg persuentar!

En nies temps semuossa buc mo il maldiever da mieds e drogas, mobein era il maldiever cun igl internet ed in sedepurtar dependent da giugs virtuals. Biars carschi han gnanc in'idea tier tut tgei paginas, films e giugs ch'els giuvenils san, senza problems, arver portas e quei en adina pli bassa vegliadetgna. Igl ei ina realitad, ils giuvenils san e vulan arver tut quellas paginas che nus carschi quitein buc gest bunas.

Mobbing sin facebook ei era in tema actual. Per informar e sensibilisar aschi bia geniturs, mo era giuvenils, sco pusseivel ha GIUVNETGNA CADI organisau ina sera d'informaziun cul num: „**Ti ed igl internet, diever e maldiever**“. Signur Diego Deplazes ha referiu ils 12 d'avrel a Mustér. Duront il di ha el luraru vid quei tema ensemen cun ils scolars dalla scola superiura da Mustér. La scola Mustér ha bugen engaschau igl anteriur scolast per aschia in di. Ei semuossa era cheu puspei: colaborar per il beinstar da nos giuvenils fa senn.

Locals da giuventetgna

Quei affon, sch'ins vul numnar el aschia, ei naschius ed ha gia fatg biaras experientschas. Il local a Tujetsch, la **TALINA**, ei aviarts duas ga il meins e vegn visitaus stediamein dils giuvenils, medemamein il local **CONS** a Mustér. Lez ei aviarts ina ga ad jamna e quei era mintgamai il venderdis sera. Cun grond plascher havein nus saviu arver cun la sera dallas portas aviartas dils 29 d'october il local da giuventetgna per la vischnaunca da Sumvitg. Biars e biaras ein s'engaschai per che quei local sappi vegnir mess a disposiziun a nos giuvenils. Il planisar las uras d'avertura ha dau empau panzieris. Organisar las seras d'avertura ei mo stau pusseivel demai che 12 giuvnas/giuvens ord scola ein sedeclarai prompts da surpender la survigilonza. Ensemen cun la gruppa da lavur dil scalem superiur havein nus fixau d'arver il local ina ga ad jamna. Cun prender risguard sin ils giavischs dils menaders havein nus la finala fixau dad haver aviert il local mintga venderdis e quei tochen la fin digl onn da scola. Sche quellas uras



d'avertura secumprovan stuein nus aunc evaluar. L'entschatta ei dada ed era quei affon ha da crescher tenor sias habilitads. A Breil havein nus organisau il matg ensemen cun la vischnaunca in « **kick off** » per anflar ora ils basegns e giavischs dils giuvenils. Igl interess per quella sentupada ei staus fetg gronds.

Pil mument ha la vischnaunca da Breil buc ina stanza ideala per saver arver in local da sentupada per giuventetgna. In giavisch ch'ei vegnius articulaus al « **kick off** » vegn denton realisau dalla vischnaunca, in pavillon da sentupada en in liug beinadattau ei planisau.

Dunna geraua Gabriela Tomaschett-Berther ha contactau mei pertuccont ina realisaziun d'in liug da sentupada per giuvenils ella vischnaunca da Trun. Egl onn 2012 vegnin nus a far ils proxims pass en caussa.

Projects

La sentupada **snow-tubing** planisada per giuventetgna ord scola ha ord munconza da neiv buc saviu vegnir realisada.



La primavera ein la giuvna Lara Spescha ed il giuven Simon Giger s'annunziai tier GIUVNETETGNA CADI per dumandar cussegliaziun e sustegn da realisar in project da far in film cun e per giuvenils cul tema mobbing. Nus havein organisau ils 2 d' avrel in casting per anflar acturs ord nossa regiun. Duront l'jamna dils 26 da zercladur tochen ils 2 da fenadur ei vegniu filmau en scola a Sumvitg, sin plaz-scola, el vitg da Sumvitg ed el local



Cons a Mustér. Ei veseva ora sco tier in set professional. Igl equipement e las personas dil fatg per filmar ein vegnidas da Vienna, collegas dil «Filmcollege», nua che Lara Spescha fa la scolaziun. Schizun la televisiun romontscha ha rapportau da quei project.



La premiera dil film « **En miu cor** » ha liug ils 14 da fevrer 2012 a Mustér.



Ils 14 da matg havein nus menau atras il cuors « **Differentas perspectivias** » a Mustér, in cuors da fotografar e surluvrar fotografias sil computer. La fotografa, signura Yvonne Bollhalder da Cuera e sia assistenta, la giuvna Diana Cabalzar han dau quei cuors.

Il cuors da **cussegliazion da bellezza per giuvnas** ei vegnius menaus atras a Trun ils 9 da november. Scolaras dall'entira Cadi ein vegnidas per schar cussegljar la coiffeusa da num Myriam Egli co far si bialas frisuras e co smincar decent.



Ils 10 da december ha giu liug in suentermiezdi/sera da kino a Dardin. L'unìun da giuventetgna Dardin ha spluntau tier GIUVNETETGNA CADI per dumandar sustegn tier quei project. Bugen havein nus susteniu ils giuvens activs da Dardin da realisar in bi e beinorganisau suentermiezdi da kino per affons e geniturs e la sera per giuvenils e giuvens carschi. L'unìun da giuventetgna ha vuliu porscher zatgei divertent all'entira vischnaunca, gie schizun all'entira regiun. Els han buc incassau entrada per vegnir a mirar ils films. Cheu ei da trer la capiala oz en ina societad ch'ei pil pli orientada sin far gudogn.

Da miu manegiar duess ei esser aschia: ils giuvens han in'idea e la bunaveglia da far zatgei, GIUVNETETGNA CADI sustegn moralmein e finanzialarmein e cusseglija ils giuvenils tochen tier la realisaziun dils projects giavischai.

Il project «**La Cadi enquera il pli bi graffiti.**» ha era uonn survegniu in object artistic dapli.



Sil mir dil sutpassadi dalla staziun a Sedrun ei vegniu sprizzau vid la preit in bellezza graffiti cun las colurs ner/alv/tgietschen. Il tema ein figuras da film. Ei vala la peina da visitar a Sedrun quell'ovra dad in per meters lunghezia.

Igl onn 2011 ei vargaus e nus sperein ch'il 2012 porti beinenqual sorpresa positiva, quei per in e scadin da nus. Cordial engraziament a tuttas e tuts che han susteniu nus finanziar ed ideal. Engraziel fetg alla regiun

surselva, allas vischnauncas dalla Cadi, alla baselgia catolica ed alla baselgia reformada per lur sprezzas finzialas, senza quellas nus savessan buc porscher als giuvenils in vast program cun in bien cuntegn.

Per GIUVNETETGNA CADI : Gabriela Cabalzar-Lombriser